

## A MMIA RU' ALI

Jàvi a cruna  
ri fila r'argentu a luna  
e m-mantu ri stidhi thrapuntu nto cielu sta notti.  
Jàvi l'uocci e u nasu e a vucca  
e pparra e 'rriri a ccu a senti e a ccu a viri.  
E gghiàvi l'ali: na nùvula ciara ravanti ca tira  
e una cciù scura c'ammutta:  
R'ogni ttantu s'ammuccia e ppuoi torna  
cciù bbedha e cciù allecra...a-bbulari.

Iu, râ finesthra, a taliu e a 'mmiriù  
e a-mmumentu m'addrizzu piliannu: " Ru' ali !  
i vuògghiu...a mmia macari ru' ali ! "  
E 'n zàutu appizzu furiusu  
ma sulu 'm-parmu mi susu  
e ddhu' ita ri 'n-tterra  
'n siènnici nudhu ri sutta c'ammutta  
e ammecci quarcunu m'afferra...mi tira...e ccaru !

Ahia! Nzurdhu scuoppu ri pïeri  
na stizza r'amaru ... 'n suspìru...  
Ma prestu 'rriru e cciànciu 'llicrizza  
nca sientu apierti ntâ menti ru' ali  
e 'm pinzieru c'abbola  
jàutu nzima ntâ luna.  
E iu ccu r'idhu cci-acciànu a-ccavadhu ri supra  
e a ffierru ppê corna  
e a gghiru  
e ntâ varca  
cchê pieri e cchê manu a rrimari  
luntanu ...mi mettu  
ppê setti mari rô cielu  
ô viersu rô suli  
ô vientu cuntentu cantannu.

E ssientu ntô piettu  
ca 'nzoccu ri stanotti m'arresta  
e râ vita...è na festa  
na fàvula bbella  
ca jàju 'i cuntari turnannu rumani.